

現代生活藝術系列

華嚴經疏論纂要 91

— 離世間品之二 —

華藏淨宗學會印贈

大方廣佛華嚴經疏論纂要卷第九十一

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

離世間品第三十八

之二

○大文第三十種力持下。有三十門。答前十行三十句問。古德分三。初六門。明大志曠遠行。二從十種不思議下。九門。明定慧業用行。三從十種園林下。十五門。明德備成滿行。然約圓融。此意非無。今不壞次。亦次第顯十行中行。第一行有

三門。二。三行各一。第四行二門。第五行六門。次
四行各二門。第十行有九門。至文當知。所以用
門多少者。檀在初。故具三戒。忍通世間。故唯一。
定慧尊勝。故有多門。智中既多。故般若中畧餘
次勝。故但用二門。又此十行。雖約十度。而義多
含。故文中或就十度明義。或就行名以釋。

佛子。菩薩摩訶薩有十種力持。何等爲十。所謂佛力
持。法力持。衆生力持。業力持。行力持。願力持。境界力
持。時力持。善力持。智力持。是爲十。若諸菩薩安住此
法。則於一切法得無上自在力持。

〔疏〕今初三門明歡喜行中之行。三中初明力持。此含總別。總者。以是十行之首。依此十事。加持建立。能起諸行。故度世經名十建立。別卽歡喜行中。凡所布施。皆爲修習諸佛本所修行等故。是建立行意。十中初三三寶。卽境界持。衆生卽僧寶。菩薩之僧。卽衆生世間故。餘七行持。悲所作業故。正起行故。願持行故。有悲智境行。方成故。時卽起行之時。後二福智。上辨陀羅尼。卽總持文義。次云受持。卽領納受行。今云力持。卽加持。任持。故不相濫。

佛子。菩薩摩訶薩有十種大欣慰。何等爲十。所謂諸

菩薩發如是心。盡未來世所有諸佛出興於世。我當皆得隨逐承事。令生歡喜。如是思惟。心大欣慰。復作是念。彼諸如來出興於世。我當悉以無上供具恭敬供養。如是思惟。心大欣慰。

〔疏〕第二大欣慰。正辨歡喜。行義彼但見乞者來。倍復歡喜。今則知由施故。見佛供佛等。心大歡喜。初行多同歡喜地故。十中畧爲五對。一事佛供佛對。復作是念。我於諸佛所興供養時。彼諸如來必示誨我法。我悉以深心恭敬聽受。如說修行。於菩薩地必得已生。現生當生。如是思惟。心大欣慰。復作是念。我

當於不可說不可說劫行菩薩行。常與一切諸佛菩薩而得共俱。如是思惟。心大欣慰。

疏二聞法親善對

復作是念。我於往昔未發無上大菩提心有諸怖畏。所謂不活畏。惡名畏。死畏。墮惡道畏。大眾威德畏。自一發心悉皆遠離。不驚不恐。不畏不懼。不怯不怖。一切衆魔及諸外道所不能壞。如是思惟。心大欣慰。復作是念。我當令一切衆生成無上菩提。成菩提已。我當於彼佛所修菩薩行。盡其形壽。以大信心興所應供佛諸供養具而爲供養。及涅槃後各起無量塔供。

養舍利。及受持守護所有遺法。如是思惟。心大欣慰。

疏三三利行成對

又作是念。十方所有一切世界。我當悉以無上莊嚴。而莊嚴之。皆令具足種種奇妙平等清淨。復以種種大神通力。住持震動光明照耀。普使周徧。如是思惟。心大欣慰。復作是念。我當斷一切衆生疑惑。淨一切衆生欲樂。啓一切衆生心意。滅一切衆生煩惱。閉一切衆生惡道門。開一切衆生善趣門。破一切衆生黑闇。與一切衆生光明。令一切衆生離衆魔業。使一切衆生至安隱處。如是思惟。心大欣慰。

疏四嚴土化生對。

菩薩摩訶薩復作是念。諸佛如來。如優曇華。難可值。遇於無量劫。莫能一見。我當於未來世。欲見如來。則便得見。諸佛如來。常不捨我。恒住我所。令我得見。爲我說法。無有斷絕。旣聞法已。心意清淨。遠離諂曲。質直無僞。於念念中。常見諸佛。如是思惟。心大欣慰。復作是念。我於未來。當得成佛。以佛神力。於一切世界。爲一切衆生。各別示現。成等正覺。清淨無畏。大師子吼。以本大願。周徧法界。擊大法鼓。雨大法雨。作大法施。於無量劫。常演正法。大悲所持。身語意業。無有疲

獸。如是思惟。心大欣慰。佛子。是爲菩薩摩訶薩十種大欣慰。若諸菩薩安住此法。則得無上成正覺智慧大欣慰。

〔疏〕五難見能見。難成能成對。文相甚顯。

佛子。菩薩摩訶薩有十種深入佛法。何等爲十。所謂入過去世一切世界。入未來世一切世界。入現在世世界數。世界行。世界說。世界清淨。入一切世界種種性。入一切衆生種種業報。入一切菩薩種種行。知過去一切佛次第。知未來一切佛次第。知現在十方虛空法界等一切諸佛國土衆會說法調伏。知世間法。

聲聞法。獨覺法。菩薩法。如來法。雖知諸法皆無分別。而說種種法。悉入法界。無所入故。如其法說。無所取著。是爲十。若諸菩薩安住此法。則得入於阿耨多羅三藐三菩提。大智慧甚深性。

疏三十種深入者。上明預欣當成。此辨現能證了。卽前法施之行。故彼云。我當盡學諸佛所學。證一切智。知一切法。爲衆生說。十中前六有入字。後四以知爲初。證入了知。一文影顯。於中初四入器世間。前三別入三世。後一總明。別中現在內。數謂多少。行謂利因。說謂彼彼果中說法。清淨謂利體。此

是通體。後總句云。種種性。卽染淨等殊。斯卽別體。次二入衆生世間。後四入智正覺世間。於中前三入三世佛。後一入法。法中初知差別五乘。後雖知下。明權實雙行。以性不壞相。故雖無分別而說種種。此中分別卽是差別。故晉經云。雖諸法無一無異而說一異。次言悉入法界無所入故者。釋成上義。謂悉入法界故無差別。無所入故而說種種。何者。若別有一入處。則入時失本相。不得說種種。以當法自虛。名入法界。無別可入。則不壞種種矣。言如其下。此上辨知。此下明說。夫說法者。當如法說。

法既權實雙融說亦卽說無著

佛子。菩薩摩訶薩有十種依止。菩薩依此行菩薩行。何等爲十。所謂依止供養一切諸佛行菩薩行。依止調伏一切衆生行菩薩行。依止親近一切善友行菩薩行。依止積集一切善根行菩薩行。依止嚴淨一切佛土行菩薩行。依止不捨一切衆生行菩薩行。依止深入一切波羅蜜行菩薩行。依止滿足一切菩薩願行菩薩行。依止無量菩提心行菩薩行。依止一切佛菩提行菩薩行。是爲十。菩薩依此行菩薩行。

〔疏〕第二十種依止。明饒益位中行。上明證入。今託

良緣徧依此十。方能饒益。非但依戒。况戒有攝善。
何所不具。鈔非但依戒者。阿難四問。佛令依戒。為師。彼以戒為饒益。即是依止之義。

佛子菩薩摩訶薩有十種發無畏心。何等為十。所謂
滅一切障礙業發無畏心。於佛滅後護持正法發無
畏心。降伏一切魔發無畏心。不惜身命發無畏心。摧
破一切外道邪論發無畏心。令一切衆生歡喜發無
畏心。令一切衆會皆悉歡喜發無畏心。調伏一切天
龍夜叉乾闥婆阿脩羅迦樓羅緊那羅摩睺羅伽發
無畏心。離二乘地入甚深法發無畏心。於不可說不
可說劫行菩薩行心無疲厭發無畏心。是為十。若諸

菩薩安住此法。則得如來無上大智。無所畏心。

〔疏〕第三十種無畏。卽無違逆位中行。由依菩薩止善。則於十難。作能作。難忍能忍。爲發無畏心。一障礙難滅。二遺法難護。三惡魔難降。四身命難捨。五外道難摧。六物心難稱。七大衆難喜。八八部難調。九下乘難離。十上行難修。於此十難。皆無所畏。豈畏衆生相惱害耶。鈔。豈畏衆者。以無違逆。行多約耐。怨害故。

佛子。菩薩摩訶薩。發十種無疑心。於一切佛法心無疑惑。何等爲十。所謂菩薩摩訶薩。發如是心。我當以布施攝一切衆生。以戒忍精進禪定智慧慈悲喜捨。

攝一切衆生。發此心時決定無疑。若生疑心無有是處。是爲第一發無疑心。菩薩摩訶薩又作是念。未來諸佛出興於世。我當一切承事供養。發此心時決定無疑。若生疑心無有是處。是爲第二發無疑心。菩薩摩訶薩又作是念。我當以種種奇妙光明網周徧莊嚴一切世界。發此心時決定無疑。若生疑心無有是處。是爲第三發無疑心。菩薩摩訶薩又作是念。我當盡未來劫修菩薩行。無數無量無邊無等不可數。不可稱不可思不可量不可說不可說不可說。過諸筭數。究竟法界虛空界一切衆生。我當悉以無上教化。

調伏法而成熟之。發此心時決定無疑。若生疑心無有是處。是爲第四發無疑心。菩薩摩訶薩又作是念。我當修菩薩行。滿大誓願。具一切智安住其中。發此心時決定無疑。若生疑心無有是處。是爲第五發無疑心。菩薩摩訶薩又作是念。我當普爲一切世間行菩薩行。爲一切法清淨光明。照明一切所有佛法。發此心時決定無疑。若生疑心無有是處。是爲第六發無疑心。菩薩摩訶薩又作是念。我當知一切法皆是佛法。隨衆生心爲其演說。悉令開悟。發此心時決定無疑。若生疑心無有是處。是爲第七發無疑心。菩薩

摩訶薩又作是念。我當於一切法得無障礙門。知一切障礙不可得故。其心如是。無有疑惑。住真實性。乃至成於阿耨多羅三藐三菩提。發此心時。決定無疑。若生疑心。無有是處。是爲第八發無疑心。菩薩摩訶薩又作是念。我當知一切法莫不皆是出世間法。遠離一切妄想顛倒。以一莊嚴而自莊嚴。而無所莊嚴。於此自了。不由他悟。發此心時。決定無疑。若生疑心。無有是處。是爲第九發無疑心。菩薩摩訶薩又作是念。我當於一切法成最正覺。離一切妄想顛倒。故得一念相應智故。若一若異。不可得故。離一切數故。究

竟無爲故。離一切言說故。住不可說境界際故。發此
心時。決定無疑。若生疑心。無有是處。是爲第十發無
疑心。若諸菩薩。安住此法。則於一切佛法。心無所疑。

疏第四發無疑心。下二門。明無屈撓位中行。於中
此門。由前於難無懼。故於十所作。決志無疑。卽被
甲精進中行。後門攝善之行。利樂徧在二門。今初
十中。一。十度攝生。二。事佛供佛。三。光明嚴刹。四。長
時調熟。五。具一切智。六。作世明燈。七。說法開悟。八。
滅障成佛。九。離妄自覺。十。決成菩提。於此十事。發
誓要期。故名被甲。

佛子。菩薩摩訶薩有十種不可思議。何等爲十。所謂一切善根不可思議。一切誓願不可思議。知一切法如幻不可思議。發菩提心修菩薩行。善根不失無所分別不可思議。雖深入一切法。亦不取滅度。以一切願未成滿故。不可思議。修菩薩道。而示現降神入胎。誕生。出家苦行。往詣道場。降伏衆魔。成最正覺。轉正法輪。入般涅槃。神變自在。無有休息。不捨悲願。救護衆生。不可思議。雖能示現如來十力神變自在。而亦不捨等法界心。教化衆生。不可思議。

疏二十種不可思議。卽所攝之善。由決志無疑。故所

爲難測。十中初三。單約善根。願智稱性。名不思議。
餘七權實。雙運。故不思議。於中前四約行。後三約
智。智約內明。行就外相。前中四涉有而一道清淨。
五悟空而萬行沸騰。六修因而入相果成。七現果
而大用不捨。皆難思也。

知一切法無相。是相。相是無相。無分別。是分別。分別
是無分別。非有是有。有是非有。無作是作。作是無作。
非說是說。說是非說。不可思議。

〔疏〕後三中。八二諦相卽。九三事融而不融。十權實
卽而不卽。八中十句五對。一境。二心。三通。一切。四

約修起。五卽名言。亦卽五法。一相。二妄想。三如如。四正智。五名。然各有二意。一。直就法體。無相是真。相卽是俗。常互相卽。下四例然。二。約迷悟五對。大同小異。謂一迷如無相。以成於相。悟相無相。卽是如如。二迷於正智無分別。卽成妄想分別。悟妄分別。卽正智無分別。三了如非有。真有如如。若執有如。則非如有。四智若無作。是作正智。若有所作。非作正智。五知名非說。是真說名。謂名有說。非是說名。

知心與菩提等。知菩提與心等。心及菩提與衆生等。

亦不生心顛倒想顛倒。見顛倒不可思議。

〔疏〕九中初融三事。後亦不下。顯離融相名爲不融。

三事。卽心佛衆生皆無差別。如覺林偈。鈔九中初融三事。心

佛衆生。三無差故。後離融相。故科云。不融就不融。中有二。一不壞相。二離融相。離融相約理無可融。

約心無想念故。不壞相約本自融。不可融故。從三事下。指文引證。

於念念中入滅盡定。盡一切漏而不證實際。亦不盡有漏善根。雖知一切法無漏。而知漏盡。亦知漏滅。雖知佛法卽世間法。世間法卽佛法。而不於佛法中分別世間法。不於世間法中分別佛法。一切諸法悉入法界。無所入故。知一切法皆無二無變易故。是爲第

十不可思議。佛子。是爲菩薩摩訶薩十種不可思議。若諸菩薩安住其中。則得一切諸佛無上不可思議法。

〔疏〕十中三句。初明盡而不盡。此約斷時以明體用。二無而不無。此將法性對斷以明體用。二句雖殊。俱是權實雙行。三雖知佛法下。明卽而不卽。於中初正明。後一切諸法下。釋成上義。悉入法界。故說相卽。無所入故。不應世中分別佛法等。謂以當法自虛。故名相卽。非世間中佛法可得。下重釋云。知一切法皆無二故。不得二中互求。無變易故。亦非

世法作彼佛法思之

佛子。菩薩摩訶薩有十種巧密語。何等爲十。所謂於一切佛經中巧密語。於一切受生處巧密語。於一切菩薩神通變現成等正覺巧密語。於一切衆生業報巧密語。於一切衆生所起染淨巧密語。於一切法究竟無障礙門巧密語。於一切虛空界一一方處悉有世界或成或壞間無空處巧密語。於一切法界一切十方乃至微細處悉有如來示現初生乃至成佛入般涅槃。充滿法界。悉分別見巧密語。見一切衆生平等涅槃無變易故。而不捨大願。以一切智願未得圓

滿令滿足。故巧密語。雖知一切法。不由他悟。而不捨離諸善知識。於如來所轉加尊敬。與善知識和合無二。於諸善根修習種植。迴向安住。同一所作。同一體性。同一出離。同一成就。巧密語。是爲十。若諸菩薩安住其中。則得如來無上善巧微密語。

疏第五十種巧密語下六門。明無癡亂中行。於中三。初二門。卽無癡之行。次二門。明無亂之行。後一門。雙明二門。引生功德。雖癡亂有通。今從別說。又此三段。卽是三禪。初卽饒益有情禪。二卽正法樂住禪。三卽引生功德禪。今初二門中。初門不愚巧

密之言。後門不愚善巧之智。今初。前既明內行。今辨外言。彼行文云。以正念故。善解世間一切言說。能持出世諸法言說等。皆言密語者。沈明有五。一說深密法故。如出現品。名如來密藏等。二一言說一切法故。上云。如來於一語言中等。亦如仙陀四實。九義瞿聲等。三近而不聞。如身子在座。遠而無隔。如日連尋聲等。四言近意遠。如說三乘爲究竟等。言遠意近。如說寒時得火。名涅槃等。此意亦名隱實說權。五以異言說異法。如覺不堅爲堅等。亦如仙陀者。謂鹽水。器馬。前已廣釋。九義瞿聲。卽俱舍論云。方獸地光言金剛眼。天水於斯九種事。智

者立瞿聲。唯金剛二字一義餘八。文中十句。初一各一。如說寒得火等。卽涅槃經。具五以是總故。一切教故。次二合二意。謂示而謂實故。卽第四意。此二皆是深密之法。卽第一意。餘通前二或並兼五。可以意得。

佛子。菩薩摩訶薩有十種巧分別智。何等爲十。所謂入一切剎巧分別智。入一切衆生處巧分別智。入一切衆生心行巧分別智。入一切衆生根巧分別智。入一切衆生業報巧分別智。入一切聲聞行巧分別智。入一切獨覺行巧分別智。入一切菩薩行巧分別智。入一切世間法巧分別智。入一切佛法巧分別智。是

爲十。若諸菩薩安住其中。則得一切諸佛無上善巧分別諸法智。

疏二十種巧分別智。外言旣密。內智又巧。故於利生。無有癡闇。故彼文云。菩薩於善知識所聽聞正法。所謂甚深法等。文義多同。十句可知。

佛子。菩薩摩訶薩有十種入三昧。何等爲十。所謂於一切世界入三昧。於一切衆生身入三昧。於一切法入三昧。見一切佛入三昧。住一切劫入三昧。從三昧起。現不思議身入三昧。於一切佛身入三昧。覺悟一切衆生平等入三昧。一念中入一切菩薩三昧。智入

三昧。一念中以無礙智成就一切諸菩薩。行願無有
休息。入三昧。是爲十。若諸菩薩安住其中。則得一切
諸佛無上善巧三昧法。

〔疏〕第二二門。明無亂行。皆是定體。於中初門。明入
三昧。顯處等不同。後明徧入。則觸類皆徧。今初。故
彼文云。善入一切諸禪定門。此中明十。皆通一切。
十中通辨。緣斯十境。入定不同。別則十門各異。而
前五一重之事。餘五涉入圓融。可知。九十皆卽一
而多。故彼行云。一念中得無數三昧。但從多分。對
前後說。判爲定體耳。非此無用。

佛子。菩薩摩訶薩有十種徧入。何等爲十。所謂衆生徧入。國土徧入。世間種種相徧入。火災徧入。水災徧入。佛徧入。莊嚴徧入。如來無邊功德身徧入。一切種種說法徧入。一切如來種種供養徧入。是爲十。若諸菩薩安住其中。則得如來無上大智徧入法。

疏二十徧入。亦猶小乘說十徧處。卽令三昧漸更增廣。前明一切如衆生身。謂童子身等。雖能一切身入。而不必一時。今此隨入一類。皆徧一切。如海初來。一切皆水等。十句可知。

佛子。菩薩摩訶薩有十種解脫門。何等爲十。所謂一

身周徧一切世界解脫門。於一切世界示現無量種種色相解脫門。以一切世界入一佛刹解脫門。普加持一切衆生界解脫門。以一切佛莊嚴身充滿一切世界解脫門。於自身中見一切世界解脫門。一念中往一切世界解脫門。於一世界示現一切如來出世解脫門。一身充滿一切法界解脫門。一念中示現一切佛遊戲神通解脫門。是爲十。若諸菩薩安住其中。則得如來無上解脫門。

〔疏〕三十解脫下一二門。明引生功德禪中。此門明作用無礙。故稱解脫後門。於境無擁。故曰神通。今初

解脫卽不思議解脫。梵云毘木义。此云勝解脫。謂殊勝作用。亦由依禪。成八解脫。十句可知。

佛子。菩薩摩訶薩有十種神通。何等爲十。所謂憶念宿命方便智通。天耳無礙方便智通。知他衆生不思議心。行方便智通。天眼觀察無有障礙方便智通。隨衆生心現不思議大神通力方便智通。一身普現無量世界方便智通。一念徧入不可說不可說世界方便智通。出生無量莊嚴具莊嚴不思議世界方便智通。示現不可說變化身方便智通。隨不思議衆生心。於不可說世界現成阿耨多羅三藐三菩提方便智

通是爲十。若諸菩薩安住其中。則得如來無上大善巧神通。爲一切衆生種種示現。令其修學。

疏二十種神通。如依四禪引六通用。此十若以六攝。前四可知。次五神境。後一漏盡。成菩提故。約位不同。與十通小異。

佛子。菩薩摩訶薩有十種明。何等爲十。所謂知一切衆生業報善巧智明。知一切衆生境界寂滅清淨無諸戲論善巧智明。知一切衆生種種所緣。唯是一相。悉不可得。一切諸法皆如金剛善巧智明。能以無量微妙音聲。普聞十方一切世界善巧智明。普壞一切。

心所染著善巧智明。能以方便示現受生。或不受生。善巧智明。捨離一切想受境界。善巧智明。

〔疏〕第六十種明下二門。明善現位中行。此門正顯行體。卽是般若。故曰智明。後門明離智障。故稱解脫。今初。然皆權實無礙之智。故稱善巧。非如十度。唯約根本。但約增微。分成五行。十中前七。單約一智。後三。雙行。前中初三約所化。次三約能化。各初事次理。後卽事歸理。七離能所想。會歸般若。念想觀除。不受境界。爲入理善巧故。鈔念想觀除者。卽智論文云。般若波羅密。實法不顛倒。念想觀已除。言語法亦滅。無量衆罪除。清淨心常一。如是尊妙人。則能見般若。

是也。念想觀除。約於內智。則不受外境。見色如盲等。而言善巧者。非涉事善巧。不念不受。是入理善耳。

知一切法非相非無相。一性無性。無所分別。而能了知種種諸法。於無量劫分別演說。住於法界。成阿耨多羅三藐三菩提善巧智明。

〔疏〕後三雙行中。八明無說之說。無成之成。善巧智明。謂雙非照寂離言。而能差別照事有說。非相遣相。非無遣無。一性遣多。無性遣有。卽性相俱寂。住於下無成之成。法界之體。實無所成。照斯法界。卽說成佛。

菩薩摩訶薩。知一切衆生。生本無有生。了達受生。不可得故。而知因。知緣。知事。知境界。知行。知生。知滅。知言說。知迷惑。知離迷惑。知顛倒。知離顛倒。知雜染。知清淨。知生死。知涅槃。知可得知。不可得知。知執著。知無執著。知住。知動。知去。知還。知起。知不起。知失壞。知出離。知成熟。知諸根。知調伏。隨其所應。種種教化。未曾忘失。菩薩所行。何以故。菩薩但爲利益衆生故。發阿耨多羅三藐三菩提心。無餘所爲。是故菩薩常化衆生。身無疲倦。不違一切世間所作。是名緣起善巧智明。

疏九明無生起。生智明。文中三。初正明。次何以下。徵釋。三是名下。結名。今初。明無緣之緣。兼顯無化之化。於中二。先明無緣。謂衆生真心稱理。不可得。故若無緣。卽無所化。而知下。明真心隨緣。不壞緣起。則亦有所化。於中二。先知所化。後結成雙行。前中文有三節。初有八句。別知緣相。因謂無明等。緣謂業行。事卽識名色等。境界卽觸受塵境。行卽現在。在變取有。生卽生支滅。卽老死。知言說者。總是隨俗緣生。不離三世故。二知迷下。十二句六對。通知染淨迷悟。迷理則倒惑雜染。悟皆反此。隨俗則俱。

可得第一義中。二俱叵得。得非得約理。著非著約智。三知住下。明知心行。住謂本性動。謂客塵。隨客塵則去而莫歸。見本性則還源反本。有還有去。皆是起心。還住兩亡。寂然不起。起則諸善失壞。不起則出離蓋纏。觸境寂知。是爲成熟。上通物我。後兼知機約自根。謂六根不爲境牽。卽是調伏。鈔三知任下。明知心行者。卽能知性相觀照之心。此中可後隨其以寂照虛懷而了。亦爲明示心觀處也。

下。結雙行中。謂智隨曲化。不失無行。二徵釋中。所以爾者。爲物發心故。結名可知。

菩薩摩訶薩。於佛無著不起著心。於法無著不起著

心於刹無著不起著心。於衆生無著不起著心。不見有衆生而行教化調伏說法。然亦不捨菩薩諸行。大悲大願見佛聞法隨順修行。依於如來種諸善根。恭敬供養無有休息。能以神力震動十方無量世界。其心廣大等法界故。知種種說法。知衆生數。知衆生差別。知苦生。知苦滅。知一切行皆如影像。行菩薩行。永斷一切受生根本。但爲救護一切衆生行菩薩行。而無所行。隨順一切諸佛種性。發如大山王心。知一切虛妄顛倒入一切種智門。智慧廣大不可傾動。當成正覺。於生死海平等濟度一切衆生善巧智明。是爲

十。若諸菩薩安住其中。則得如來無上大善巧智明。
〔疏〕十平等教化智明中。三初明實不礙權。二知種
種下。權不礙實。三於生歿下。結名並可知。

佛子。菩薩摩訶薩有十種解脫。何等爲十。所謂煩惱
解脫。邪見解脫。諸取解脫。蘊處界解脫。超二乘解脫。
無生法忍解脫。於一切世間一切刹一切衆生一切
法離著解脫。無邊住解脫。發起一切菩薩行。入如來
無分別地解脫。於一念中。悉能了知一切三世解脫。
是爲十。若諸菩薩安住此法。則能施作無上佛事。教
化成熟一切衆生。

〔疏〕二十種解脫。脫二障故。梵云毘木底。此云解脫。與前不同。十中初四。脫凡三障。取增爲業故。後六。脫智障。初一揀劣。餘皆顯勝。

佛子。菩薩摩訶薩有十種園林。何等爲十。所謂生死是菩薩園林。無猒捨故。教化衆生是菩薩園林。不疲倦故。住一切劫是菩薩園林。攝諸大行故。清淨世界是菩薩園林。自所止住故。一切魔宮殿是菩薩園林。降伏彼衆故。思惟所聞法是菩薩園林。如理觀察故。六波羅蜜。四攝事。三十七菩提分法。是菩薩園林。紹繼慈父境界故。十力。四無所畏。十八不共。乃至一切

佛法是菩薩園林。不念餘法故。示現一切菩薩威力。自在神通。是菩薩園林。以大神力轉正法輪。調伏衆生。無休息故。一念於一切處。爲一切衆生。示成正覺。是菩薩園林。法身周徧。盡虛空一切世界故。是爲十。若諸菩薩安住此法。則得如來無上離憂惱大安樂行。

〔疏〕第七園林下二門。明無著位中行。於中此門。明游處縱情。後門明棲止適悅。皆通二利。權實方便。而無所著。今初可知。

佛子。菩薩摩訶薩有十種宮殿。何等爲十。所謂菩提。

心是菩薩宮殿。恒不忘失故。十善業道。福德智慧。是菩薩宮殿。教化欲界衆生故。四梵住禪定。是菩薩宮殿。教化色界衆生故。生淨居天。是菩薩宮殿。一切煩惱不染故。生無色界。是菩薩宮殿。令諸衆生離難處。故。生雜染世界。是菩薩宮殿。令一切衆生斷煩惱故。現處內宮。妻子眷屬。是菩薩宮殿。成就往昔同行衆生故。現居輪王護世。釋梵。是菩薩宮殿。爲調伏自在心衆生故。住一切菩薩行。遊戲神通。皆得自在。是菩薩宮殿。善遊戲。諸禪解脫。三昧智慧故。一切佛所受。無上自在。一切智王。灌頂記。是菩薩宮殿。住十力莊

嚴作一切法王自在事。故是爲十。若諸菩薩安住其中。則得法灌頂。於一切世間神力自在。

〔疏〕二宮殿十中。四梵住者。卽四無量。亦色因故。故度世云。修四梵行。慈悲喜捨。餘可知。

佛子。菩薩摩訶薩。有十種所樂。何等爲十。所謂樂正念。心不散亂。故樂智慧。分別諸法。故樂往詣一切佛所。聽法無厭。故樂諸佛。充滿十方無邊際。故樂菩薩自在。爲諸衆生。以無量門而現身。故樂諸三昧門。於一三昧門。入一切三昧門。故樂陀羅尼。持法不忘轉受衆生。故樂無礙辯才。於一文一句經。不可說劫分。

別演說無窮盡故。樂成正覺爲一切衆生以無量門示現於身成正覺故。樂轉法輪摧滅一切異道法故。是爲十。若諸菩薩安住此法則得一切諸佛如來無上法樂。

〔疏〕第八所樂下二門。明難得位中行於中此門內心願樂願卽行體。旣處宮殿則情欣勝樂故。

佛子。菩薩摩訶薩有十種莊嚴。何等爲十。所謂力莊嚴。不可壞故。無畏莊嚴。無能伏故。義莊嚴。說不可說義無窮盡故。法莊嚴。八萬四千法聚。觀察演說無忘失故。願莊嚴。一切菩薩所發弘誓無退轉故。行莊嚴。

修普賢行。而出離故。刹莊嚴。以一切刹作一刹故。普
音莊嚴。周徧一切諸佛世界。雨法雨故。力持莊嚴。於
一切劫行無數行。不斷絕故。變化莊嚴。於一衆生身
示現一切衆生數等身。令一切衆生悉得知見。求一
切智無退轉故。是爲十。若諸菩薩安住此法。則得如
來一切無上法莊嚴。

〔疏〕二十莊嚴。卽外德莊嚴。具以衆德莊嚴願故。文
並可知。

佛子。菩薩摩訶薩發十種不動心。何等爲十。所謂於
一切所有悉皆能捨不動心。思惟觀察一切佛法不

動心。憶念供養一切諸佛不動心。於一切衆生誓無惱害不動心。普攝衆生不揀怨親不動心。求一切佛法無有休息不動心。一切衆生數等不可說不可說劫行菩薩行不生疲厭亦無退轉不動心。成就有根信。無濁信。清淨信。極清淨信。離垢信。明徹信。恭敬供養一切佛信。不退轉信。不可盡信。無能壞信。大歡喜踊躍信。不動心。成就出生一切智方便道不動心。聞一切菩薩行法信。受不謗不動心。是爲十。若諸菩薩安住此法。則得無上一切智不動心。

〔疏〕第九不動心下二門。明善法位中行。此門明外

緣不動。後門明內心不捨。又此明心堅。後明深入。皆是力義。今初十中。二及第九。是思擇力。餘皆修習力。八中有十一信。一。生佛果故。二。不雜不信濁故。三。淨無煩惱故。四。無細念故。五。離所知垢故。六。徹事源故。七。向果位故。八。自分堅故。九。德無盡故。十。緣不動故。十一。證真如故。餘竝相顯。

佛子。菩薩摩訶薩有十種不捨深大心。何等爲十。所謂不捨成滿一切佛菩提深大心。不捨教化調伏一切衆生深大心。不捨不斷一切諸佛種性深大心。不捨親近一切善知識深大心。不捨供養一切諸佛深

大心不捨專求一切大乘功德法深大心。不捨於一切佛所修行梵行護持淨戒深大心。不捨親近一切菩薩深大心。不捨求一切佛法方便護持深大心。不捨滿一切菩薩行願集一切諸佛法深大心。是爲十。若諸菩薩安住其中。則能不捨一切佛法。

〔疏〕二不捨深大心者。由不動故。能窮理事。理深事廣。故云深大。十句可知。

佛子。菩薩摩訶薩有十種智慧觀察。何等爲十。所謂善巧分別說一切法智慧觀察。了知三世一切善根智慧觀察。了知一切諸菩薩行自在變化智慧觀察。

了知一切諸法義門智慧觀察。了知一切諸佛威力智慧觀察。了知一切陀羅尼門智慧觀察。於一切世界普說正法智慧觀察。入一切法界智慧觀察。知一切十方不可思議智慧觀察。知一切佛法智慧光明。無有障礙智慧觀察。是爲十。若諸菩薩安住其中。則得如來無上大智慧觀察。

〔疏〕第十智慧觀察下九門。明真實位中行。卽分爲九。一觀察智。二說法智。三離障智。四審決智。五照徹智。六無等智。七無劣智。八高出智。九深廣智。今初亦由不捨深大。故能觀察。前問但言觀察者。脫

智慧言十句準思

佛子。菩薩摩訶薩有十種說法。何等爲十。所謂說一切法皆從緣起。說一切法皆悉如幻。說一切法無有乖諍。說一切法無有邊際。說一切法無所依止。說一切法猶如金剛。說一切法皆悉如如。說一切法皆悉寂靜。說一切法皆悉出離。說一切法皆住一義本性。成就是爲十。若諸菩薩安住其中。則能善巧說一切法。

〔疏〕二說法智。由能內觀。故能外說。十中初二說俗。後八說真。一無二可諍。二體德兼廣。三相深遠。四

體堅利。五如如不動。六體絕百非。七在纏不染。八體相一味。

佛子。菩薩摩訶薩有十種清淨。何等爲十。所謂深心清淨。斷疑清淨。離見清淨。境界清淨。求一切智清淨。辯才清淨。無畏清淨。住一切菩薩智清淨。受一切菩薩律儀清淨。具足成就無上菩提三十二種百福相。白淨法一切善根清淨。是爲十。若諸菩薩安住其中。則得一切如來無上清淨法。

〔疏〕第三十種清淨。卽離障智。此離智障。晉名無垢。故雖同清淨。所淨不同。十中與七淨。有開合不同。

在文易了。七淨如五地初辨

佛子。菩薩摩訶薩有十種印。何等爲十。所謂菩薩摩訶薩知苦苦。壞苦。行苦。專求佛法。不生懈怠。行菩薩行。無有疲懈。不驚。不畏。不恐。不怖。不捨大願。求一切智。堅固不退。究竟阿耨多羅三藐三菩提。是爲第一印。

疏第四十種印者。卽決審智。以清淨智決定印可一切法故。故晉本中。名爲智印。後所結益亦是智印。亦猶三法印等。鈔亦猶三法印等等取四十中一於安受苦境。忍智不動。

菩薩摩訶薩。見有衆生愚癡狂亂。或以麤弊惡語而相毀辱。或以刀杖瓦石而加損害。終不以此境界捨菩薩心。但忍辱柔和。專修佛法。住最勝道。入離生位。是爲第二印。

〔疏〕二他不饒益。忍行決定。

菩薩摩訶薩。聞說與一切智相應甚深佛法。能以自智深信忍可。解了趣入。是爲第三印。

〔疏〕三於佛法深信忍決定。卽諦察法忍。

菩薩摩訶薩。又作是念。我發深心。求一切智。我當成佛。得阿耨多羅三藐三菩提。一切衆生流轉五趣受。

無量苦。亦當令其發菩提心。深信歡喜。勤修精進。堅固不退。是爲第四印。

〔疏〕四決定成佛度生

菩薩摩訶薩。知如來智無有邊際。不以齊限測如來智。菩薩曾於無量佛所聞如來智無有邊際。故能以齊限測度。一切世間文字所說皆有齊限。悉不能知如來智慧。是爲第五印。

〔疏〕五決定知佛智無邊

菩薩摩訶薩。於阿耨多羅三藐三菩提得最勝欲。甚深欲。廣欲。大欲。種種欲。無能勝欲。無上欲。堅固欲。衆

魔外道并其眷屬無能壞欲。求一切智不退轉欲。菩薩住如是等欲。於無上菩提畢竟不退。是爲第六印。

〔疏〕六決欲佛果不退

菩薩摩訶薩行菩薩行。不顧身命無能沮壞。發心趣向一切智故。一切智性常現前故。得一切佛智光明。故終不捨離佛菩提。終不捨離善知識。是爲第七印。

〔疏〕七決不顧身命以親人法

菩薩摩訶薩。若見善男子善女人。趣大乘者。令其增長求佛法心。令其安住一切善根。令其攝取一切智心。令其不退無上菩提。是爲第八印。

〔疏〕八決度已入大乘者

菩薩摩訶薩。令一切衆生得平等心。勸令勤修一切智道。以大悲心而爲說法。令於阿耨多羅三藐三菩提。永不退轉。是爲第九印。

〔疏〕九決平等度

菩薩摩訶薩。與三世諸佛同一善根。不斷一切諸佛種性。究竟得至一切智智。是爲第十印。佛子。是爲菩薩摩訶薩十種印。菩薩以此速成阿耨多羅三藐三菩提。具足如來一切法無上智印。

〔疏〕十決同佛體。因圓果滿

佛子。菩薩摩訶薩有十種智光照。何等爲十。所謂知
定當成阿耨多羅三藐三菩提智光照。見一切佛智
光照。見一切衆生死此生彼智光照。解一切修多羅
法門智光照。依善知識發菩提心集諸善根智光照。
示現一切諸佛智光照。教化一切衆生悉令安住如
來地智光照。演說不可思議廣大法門智光照。善巧
了知一切諸佛神通威力智光照。滿足一切諸波羅
蜜智光照。是爲十。若諸菩薩安住此法。則得一切諸
佛無上智光照。

〔疏〕第五智光照。卽照徹智。由印定故。照徹無礙。十

句易知

佛子。菩薩摩訶薩有十種無等住。一切衆生聲聞獨
覺悉無與等。何等爲十。所謂菩薩摩訶薩雖觀實際
而不取證。以一切願未成滿故。是爲第一無等住。菩
薩摩訶薩種等法界一切善根。而不於中有少執著。
是爲第二無等住。菩薩摩訶薩修菩薩行。知其如化。
以一切法悉寂滅故。而於佛法不生疑惑。是爲第三
無等住。菩薩摩訶薩雖離世間所有妄想。然能作意
於不可說劫行菩薩行。滿足大願。終不中起疲厭之
心。是爲第四無等住。菩薩摩訶薩於一切法無所取

著以一切法性寂滅故而不證涅槃。何以故。一切智道未成滿故。是爲第五無等住。菩薩摩訶薩知一切劫皆卽非劫。而真實說一切劫數。是爲第六無等住。菩薩摩訶薩知一切法悉無所作。而不捨作道求諸佛法。是爲第七無等住。菩薩摩訶薩知三界唯心。三世唯心。而了知其心無量無邊。是爲第八無等住。菩薩摩訶薩爲一衆生。於不可說劫行菩薩行。欲令安住一切智地。如爲一衆生爲一切衆生。悉亦如是。而不生疲厭。是爲第九無等住。菩薩摩訶薩雖修行圓滿而不證菩提。何以故。菩薩作如是念。我之所作本

爲衆生。是故我應久處生死。方便利益。皆令安住。無上佛道。是爲第十無等住。佛子。是爲菩薩摩訶薩十種無等住。若諸菩薩安住其中。則得無上大智。一切佛法無等住。

疏第六無等住。卽無等智。由前照徹。故不偏住著。雙住事理。無與等故。列十中。皆權實雙行。或卽寂之用。卽用之寂等。竝顯可知。

大方廣佛華嚴經疏論纂要卷第九十一

觀山菴比丘理高刊刻

華嚴疏論纂要第九十一卷伏願

生生不昧真因在在常遇正法願如普
賢繁興妙行均資恩有同圓種智

康熙二十年四月

華藏寺題